

江文通文集卷第八

梁 濟陽江淹著

明 新安汪士賢校

蕭太尉上便宜表

臣公言臣聞經邦緯治去華爲急體國字民循素乃
安聖誥遺風具騰丹冊賢言未流備宣青史何嘗不
翦削浮奢銷遣文繪然後頌音載興澤洽式廣楚駕
百馬民雜國彫秦脩萬騎教亡業墜刻楠丹楹禮有
常序朱幡皂蓋古無濫秩縹衣綸綬漢置前寄制服

惟物周設常刑皆節俗約訓反樸還風肅政黎心釐
一民志故禮奢寧儉宣尼之高風以義止利孟軻之
宏規若乃文彩利劍道鑒其元彫蟲篆刻世炤其淺
雖儒墨異學名法各治至於遵本捨末其槩一也故
荀韓之立典君晏之制書賈陸之鴻筆嚴徐之博辭
食賀興志隨鐵生論莫不異說而同儉垂議而共治
然世淪物起道缺事遷蓋源起西秦波被東漢一魏
不變二晉未革所從來者遠矣洎高祖武皇帝業高
縣寓化格區宙非躬謙度方追重華納麓之勤約情

僞操乃取文命卑宮之義去金錦之巧無帷帳之飾
唯修遠圖綏國之術祈勸力耕濟世之規是以政平
刑偃紫階斯廓太祖文皇帝恭已明臺之上聽政衢
室之下九官咸靜萬績惟凝亦復務抑華詡思裁參
太輿馬翠翟之麗斟登乎外禁瑤碧綺組之玩罕設
於內宮故大德立而五路謐鴻名建而四民寧者也
自頃政教日替敦教月虧誰惟歷稔亦日淹紀至乃
帝臺傾海外之寶王城盡天下之祕象席珠履一躡
而卽收鏤琴綵瑟再撫而已損褻衣隨塵而罷羅袂

江文通集卷八
從風而棄百民染其聲奢萬姓被其馳蕩故闐闐之
里富者竊梁楚之乘伎巧之家豪者襲王公之服於
是有文靡虛麗驕邪不典之器精織空飾妙蠱非常
之玩農夫勤耨不充浮伎之資蠶女務織無給點刻
之費將恐去實就華未知所屈背源從流不識其止
求國富兵強寧可得乎今江南所宅正漢魏兩州之
地戶口所檢裁文景三郡之民舊齊故魯鞠爲茂草
全趙盛魏豺狼所嗥陛下方欲鳴鑾中土朝服濟河
不改斯術則未見其可也臣謬屬大任竊同憂不自
晏宵分實忘饑寢草治其莠職此爲先輒具條便宜
可以安邦利民者事事如右幸以聞見謹簡聖聽若
其咸允謹請勅付外施行

讓太傅楊州牧表

崇絕之寵降自白日殊甚之禮墜於青雲祇畏驗盛
若奪菟鑿巡席無容當軒改色中臣聞天地之大德
曰生聖人之大寶曰位將以啓廓靈緯崇樹神紀百
司備列貴賤之分旣炳九官咸贊升降之際可明故
皇極不爽國步斯泰雖金媯各政姬華異治未有革

序變倫而能流英發耀者也臣才慙右賢功愧上烈
平趙夷魏之氣無宣於國書濟河登山之威未亮於
左史旣罕龍韜金匱之効又乏楹間帷中之績衛主
寧謂捉橫流臣危不足生細民故小節明顯於艱難
大勲無紀乎廊廟而乘輅服冕荷蕭張之賞開城裂
域受曹鄧之爵不能翊教緝政釐濟氓隱贊邦弘化
飾整朝輝是以德少寵多與人立規才薄位厚處士
興議故玉燭未調道治猶鬱者臣之爲媿也不悟陛
下復停日月之華凝煙露之潤權臣瑣姿鑿臣兩誠
前恩未曠後寵已襲上公秘鉞聲振都鄙文劔彫舄
禮殊軒殿深褒之逮方今爲絕大賚之降比古爲超
臣亦何功當處斯忝伏願道邈先帝理鏡衆寂被氣
順方涵生獲慶特輟策書時停鴻冊則人歌僉平物
抱至歡

蕭重讓楊州表

臣某言臣以功狹賞峻世誥所譏才弱寵隆道經所
講故寫寃誓膽庶留天矚圖驕慮滿護守私吝不能
青蘋引風陽燧要景復降綸冊徵采兼明影迹交戰

水煙相薄

謝中

竊聞周夏異章玄素各禮儒道二宗名

墨兩教咸以裕俗爲急僉以得人爲寶於是尊官上

品乃貽玉振之賢鴻等懋列爲取金聲之彥或有濟

世夷難之略輝燿內氓導江疏山之勤纏結中寓深

德行溢大功振驚然後超居國右鬱處朝端故九職

惟宣六典式序丹青所以傳其藹馨瑄所以揚其音

也臣才救識淺非集譽於鄉曲榮降寵臻乃假翼於

皇極遂事等話言之寄任鈞符負圖之重職惣表裏

地聯機務位班昔良知闕前修居官不聞其風處秩

焉見其政寰域之治未緝街縣之訟方興繒販之士

無薦管庫之家寂寞四維不闡五教罕聞安可以底

慎財賦交正庶士者也今輟和毗道反身替業尚據

晦撓獲蔽瑛圖况異禮更飾褒命復從名超列辟爵

擬羣后上仁居之猶涵慙德臣實空儒伊何以勝旣

誣人文將黷玄緯凌歷飛流之青懼失正和晦裂蜺

霧之災且濫庶物臣是以寤寐求歎憂國慮私者也

伏聞陛下裁天賦品制地平施使曠世之典不遂臻

於未躬迥代之軌無頓被於茲日素心丹魄皦然靡

疲矣不任憂迫之情

後讓太傅揚州牧表

臣公言臣再辭非謙重讓靡飾實以爵高中世歷古
所難寵冠上俗絲代誰易詳圖辨箴如鏡如水檢崖
覽志匪彫匪文蒐祈夢請駐心挂氣陛下猶降以璽
書之榮被以丹碧之采頓然變容一慮九逝中臣以
爲寒暑繇乎平分晦明驗乎天道咎譽起於微薄得
吝生於小疵故金衡既陳錯髮之異必縣銅墨咸計
分撮之殊已傾聖哲不能爽鬼神莫由避况臣鄙

早盈陋才久溢第超庶后禮絕群班仰贊東序之賓
平參北宮之政窮盈極滿於斯爲甚鑿茲降替淵冰
非譬所以坐洞房而不悟下輕帷而嘆息也古之馭
教當有道焉量能而受賞撰智而錫位深乃裂組遠
故分珪前人以爲稱首昔人以爲美詠自非上德橫
乎天地高績格于區宇烈譽馥於一時茂名鬱乎當
世者豈有降今日而莫先哉臣爰蒙殊寄六稔遂交
及荷愆任二燿忽周末能塞謗生民獲免僮訟何盛
勲之足題詎深烈之可銘乎而因委忝濫踰溢倫等

朱軒躍馬光出電入貂冠紫綬寵藹霞炤臣聞闔宗
奉國猶非報殉方將身侍纓華雪齊魯之侵地手執
羈勒驚燕趙之遠郊然後追迹范張濯纓汾射臣之
志也華爵盛典非所敢寧伏炤右廵將流聖察無使
匹桀血誠不諒於璿宸宏芬英猷遂燕於里聽豈伊
庸臣獨去其庇亦曰海隅咸被其利焉

蕭被侍中敦勸表

臣公言卽日侍中臣惠基給事黃門侍郎臣王僧珍
至朱蓋乘雲玄軒肅霧墜高天之旨集微臣之軀神

爽懼然歛影無地

中謝

臣初長血心未啓素槩辭從意

空言隨事盡不能降陛下一時之恩借俄頃之炤遂
枉近侍貂簪軼庭臣自亮無庸何以集此退咎慊誠
悲枉垂光進戒朝訓虧茲盛序感慮躑躅榮結夢寐
臣檢古少例廵令逾疑豈有妄叨天功虛竊上賞近
謬國華坐取隆貴人見其過外惜皇猷內畏私青昔
西京鼎秩漢世權家丹墀網戶擊鍾連騎何常不以
驕滿貽戾謙冲要福者哉臣不能遵煙洲而謝岐伯
迎雲山而揖許由激昂榮華之間沈潛印組之內光

飾旣超寵靈亦遠江左已來罕見其倫今位冠朝端
通侯萬戶結象弭於前衝奏金管於後陣都野宗其
榮盛視聽敬其炎貴臣一旦居之誰以爲不忝者乎
而陛下猶崇以異禮者是增臣之戾也况復肅延華
勸實深窘迫伏願俯矜單志賜遂前請則世寢橫議
臣蒙緩責

蕭被尚書敦勸重讓表

臣公言臣五寫丹翹宜蒙凝炤一降玉人遂無蠲察
復遣尚書臣武兼侍中臣奐等奉宣慈靈重賜

鏡伏廻環憫默失圖心鬼交據淵谷匪譬中臣自初

被詔迄于今時載慙載疑以悚以厲豈非深懼鴻典
永憂末躬故琴瑟徒鳴不傳廣樂之響燈燼空舉焉
續經星之耀何則卓乎小者不足以任大守于蔽者
不可以語通臣器乏淵源識暗機務倫濟夷險每憑
璿曆之遠龕折氛蜺輒資群才之効臣寧有採竒鑿
隱之能網國提民之功乎不謂過延渥洽謬攀河漢
榮宗蓋益寵華曄映藉聲探議共知其幸况傳保之
崇殷周特貴牧司之寄魏晉稱重上昭妙德次擬英

勲有踰茲序，鈔不紊裂。今陛下方闢金門之聽，調繡
展之政，何得去禮廢雅，近於臣始既無前章，孰表後
世。臣才孤位峻，待罪無日矣。情哀理感，事盡於斯。伏
願一運天景，微見藹心。則物不逃形，臣何恨焉。不勝
焦憂狼狽之至。

蕭讓劔履殊禮表

臣公言近仰跼威靈，辭移理奪，故欲冒忝傳識，必避
殊禮。不悟復凝令詔，雕飾非常，鏡睇未周，金火交慮。
中謝臣聞寵以昭賢，不濫才外之華，熒以麗身，豈謀分

表之渥，哲后所以僉授貞臣，所以慎荷故行。珪行玉
尚無輕頒一爵，一號猶宜詳品。况劔舄升陛，贊唱異
儀，殆為對越神體，抗禮天極。漢魏舊載，唯斯稱重。雖
英衮筵朝，賢武滿世，蒙此典者，乃曠古時降耳。諒由
功饒賞結，名高器深，金蟬綠綬未藹其采，瓊珮朱
紱不足宣其榮。方加以履殿優以勿趨，至弟為上
公，貴為皇王，佇望慈禮，猶邈如也。臣何燁業兼昔
人，且令所慮受以懼覆，悔豈復聞殊旨，增其憂迕抱
此愚歎，以殞為請。伏願天鑒順臣所守，則雖歿九幽

傳榮萬葉矣

蕭拜太尉揚州牧表

玄文既降雕牒增輝禮謁前英寵華昔典仰震威容
俯慙陋識心克戰慄若殞若殞中謝臣景能驗才無假
外鏡撰已練志久測內涯故讓不飾迹辭非謙距寸
亮尺素頻觸瑤纈丹情實理備塵珠冕而神居寂阻
九重嚴絕徒懷漢臣伏闕之誠競無魯人迴日之感
所以迴懼鴻威後奔殊令者也既而永鑒隆魏緬思
宏晉國之大政在功與位故 民紐亂不處輿臺之

下去勲捨德寧班衮司之上咸以休對性業裁成器
靈詎有移風變範尅耀倫序者乎臣績不昭忠豈宜
國名爵赫曦僴俛優忝陛下久超以異禮之榮越次
殊常之秩雖寢寐矜戰曲垂哀亮而璽冊冲正愈賜
砥礪今使肅順天誥恭聞眷典審躬酌私必跋危撓
將悉氓俗由此方擾軌訓以之交蕪臣豈不勉智罄
忠也未知所以報奉淵聖輸感霄極取諸微躬長爲
慙荷

蕭太尉子姪爲領軍江州兗州豫州淮南黃

門謝啓

臣公言臣頻結崇籠龍亟延上爵休恩動俗烈榮振古
鴻品清飾已藹金圖秀鼎號銘共茂瑤篆永言戚慮
鑒寐殷心况乃秩洽朝門慶霑國珮弱息臣諱疑映
晃等文不昭典武不定功出內帷闡升降貂綬或振
迹領候職贊禁錡或騰光江甸任鈞屏翼河充衝要
既濫北門之管淮豫險捍又謬西偏之寄兄子臣鸞
忝守近畿嫡孫臣某載華省闈皆倏忽晷景頻煩升
荷雖咸罄愚識恪居匪替豈足以少塞神渥裁酬皇
眷冀黷一盈慙厲彌積談天之辨不能爲臣陳辭雕
龍之文無以爲臣飾愧靜然肅念徘徊交集不任憂
感沐浴之情

蕭太傅謝追贈父祖表

臣公言卽日兼謁者僕射姓名奉宣詔書追贈臣亡
祖某太常卿亡父某爲散騎常侍特進左光祿大夫
寵輝泉扃恩凝松石奉渥銘心祇光慟慮中臣行阻
祗玄躬早荼棘如創之痛晷日不追終身之恤霜露
彌感雖慙曾與喬木之敬實抱仲路華轂之哀自謬

藉珪金空貽組紱爵侈於公祿盈於私何嘗不靜歛
其結默慕交深不悟著孝動天昭性曠古惠被遠紀
澤演慶世丹請靡諒峻冊愈凝大榮焦身尚驚異施
况寵洽山拍特振殊造銷骨瀝命猶不勝謝不任鯁
泗荷珮之誠

蕭太傅東耕教

三府二州綱紀夫寶農賤貨綵炤周滕巡耕去販光
炎漢錄故能業滋都野產殷絃縣吾任屬弘寄思爾
治源慮以感情以宵嘆今玄司調氣青衺佇節

既柔服方秀電爍有期桐萌無遠便當躬速糾
耦道先列辟事均暫勞迹在求豫可剋日備辦詳典
施行

蕭太傅辭輿駕親幸表

臣公言近以神輿將降昌啓丹辭重被還旨未垂闈
允謙尊彌光褒優愈臨慙疚既積敢忘謙請臣乘幸
藉私豈曰無僭攀霞鏡月非復常所此必讓德信在
於茲但恩嚴交泊固守莫從免默恭典伊榮加戚寧
容爰枉鸞駕式驚臣府訪心驗已諒以不夷求物校

迹誓無此義且古今異飾紫青變禮取諸臣躬未覲
其安伏願陛下賜止冕輅時停雲駕則俗踐知方臣
蹈厚恭

蕭讓前部羽葆鼓吹表

臣聞國容軍禮旌羽昭其華品騎第乘鸞鸞藹其飾
所以炎耀仙都崇麗神境世教以之垂彩民聽以之
流文故勒岫銘海之功輶革寫其詠龕難夷邦之業
簫管凝其聲朱鷺玄雲旣錫上德華山芳樹以頒奇
勲爰及台賢位高藩戚名泐恩炤寵垂私賞皆爲發

吹後陣豈曰兼奏前軒茲典罕行此禮實曠臣竊服
已弘叨光無限才局秩遠常銜獨耀安可二葆同整
雙弄頓驚覽躬惕然特貽厚謬伏願明燦日月靡忘
情鑒將停盛飾遂臣慊心則涵惠旣饒恭錫多矣

謝開府辟召表

臣公言近被詔旨賜令臣府自辟僚賢竊聞治以才
爲寶教以人爲貴激風揚絃賓資山東之英凝華重
馥良在關西之彥近以闡耀世經發麗朝序今州策
郡聘茲禮尚堙台召鉉辟斯文亟暖豈非盛美難嗣

故曠寂先芬者哉臣謬贊國機職宜水鑒未能澄刑
炤藝薦品任官既乖覆業彌感深寄仰屬皇心遙覃
察政洞俗弘此懿典崇臣遠寵輒祗眷恩謹宣巖壑
庶幽居之士蘿薜可卷奇武異文無絕於古

蕭上銅鐘芝草瓊瑞表

臣公言臣聞象際玄通豈以明昧咀運幽崖遙鏡不
以人靈異謀威書壁誥旣信其綵綠鱗丹字彌驗其
文是以業藹鴻經則煙露呈炤精昭景緯則川岳發
華故寶鼎白雲瑞集軒世芝房赤鴈祥委漢年

鴻鐘遠炳晉室玉壁靈器近耀皇宗自火明乘規泰
始疊矩朱髻素毳之至史不絕書奇葉珍柯之獻府
無虛月今懋曆啓圖靈基再固頃歲以來禎應四塞
近獲豫州刺史劉懷珍解稱所統建寧郡建寧縣昌
村民於万山中採藥忽聞異響從石上得銅鼓一枚
長二尺一寸遠像古鑄近乖今製又州界之內樹生
連理二木隔澗藤枝相通越壑跨水合爲一榦方之
舊說彌復爲貴宣城所統臨城縣山中獲草一株交
柯攢莖紫蓋黃裏貞潤曄曄自然天華採掇歷時質

色不變

柄據有徵近獲吳興太守臣王奐云

十一月二十九日解所統長城縣令臣張撫解稱其
月二十五日甘露降縣東界下山之陰又東太守臣
腦解所統武進令臣紀法宗云十一月十日解稱其
月二十四日甘露降於彭山松樹至九日又降如初
臣以祥緯雜沓星燭波連斯乃靈迹深覃眷衷賡感
理應寫順祇無涵秘稽往徵古僉欣升泰瑤光日闡
王繩永休謹拜表遣兼長史參軍臣姓名奉銅鐘芝
草以聞

江文通集卷第八終

江文通文集卷第九

梁 濟陽江 淹著

明 新安汪士賢校

蕭讓太傅相國齊公十郡九錫表

備九錫之禮非常之冊分天而降冠古之典開河而
出遙然以慙奄交象魏中臣聞日月權輿二儀所以
剋靈君臣設極三統所以式固惟生與位謂之大寶
辨諸文而尊卑既炳觀羣龍而貴賤可正雖復殷因
於夏王資於帝至乎建侯分職體國經野其揆一焉

是以二周之始山河愈廣兩漢之初封賞彌盛然表
東海者實牧野之日瞻魯邦者乃負圖之辰西都英
相信命世之功關中上宰亦龕亂之力拒鬯彤弓本
西伯之賞虎賁戎路又晉公之典若乃衣裳盟會九
合一匡猶慙德斯禮也臣實鄙才靡識大體徒以忠
貞爲槩而勞不足銘雖以丹素爲誠而功無可勒豈
有經天緯地之略探隱炤寂之智哉抑亦何術以堪
盛休是以覽雲際而懷古憑軒櫺而未寧也伏惟陛
下神華馭世理無不鏡賜臣待謗今職守其私清則
天下有道庶人不疑矣

第二表

臣公言臣近勵心罄辭寫情畢議眇望神藻鑒見丹
襟而帝闈以祕論誥方明中庶卷容左右軫慮中臣
以爲麗天秉經君上之委憲儀地執緯臣下之恒軌
故皇極載凝庶士交慎昔者重黎勤官裁居炎冥之
職羲叔能任方掌日月之序至乎御龍勤夏未聞冠
俗之爵大彭翼商豈見超世之典以古先哲后如茲
之慎賞也臣乃謬貽國寄志在靜難若夫野戰虹蜺

伏順者易爲威城攻黥虺奉國者理必全雲氣薄蝕
下民咸貴其明恃險輿馬舟中皆可異議故昌邑有
歸邱吳楚無旋師斯激芬楊蕤物同其幸焚惡去醜
世共其底實爲仰憑俯順之効臣亦何力之有焉竊
謂祿爲十郡必俟禹迹之勤錫以九命乃須周公之
美况呂梁不鑿而噐重玄珪越裳未獻而賦擬千乘
京關識其崇貴畿服知其忝冒鏡前修而慙形覲往
德而從慮畏崖之請取誓深水審量之祈呈炤皦景
伏願陛下遠牽雄範近覽英規憑霞停詔臨風輟恩
豈伊愚臣方獨昌化具日遺氓咸蒙其賴矣

被百僚敦勸受表

臣公言臣欵誠素履頌載練翰天飾高獎累降史筆
卽日尚書臣某等至重宣詔旨猥辱百僚省睇未交
心靈已悸中謝臣聞良宰謀朝不必借威貞臣衛主修
已則足故驕滿之失取鏡函關謙測之美見炤伊闕
臣本庸人識無遠度籍開闢之辰遭攬槍之運姦回
內讎則戮力瓊都諸侯放命則抗節瑤祀秉號仗義
幸不辱威皆爲冕旒遙鑒之明群士畫圖之助臣寧

望伊摯叔且之爵呂牙申明之賞哉方欲謝筵東都
濯冠汾陽不悟盛禮華典復臻於茲靜默迴環祗畏
躑躅猶謂遇聰明之朝當時雍之世陛下詠堯風之
化歌卿雲之詩日月華采萬方獲性疊慮仰祈必蒙
題品而威嚴窈絕斯異遂阻鑾輿王駕復許敦幸重
臣愆悔無地自安便當謹恭鴻命竭身爲限

蕭拜相國齊公十郡九錫章

殊命寶典鬱降雲天采詔軒騎光流城禦震驚華禮
神氣交越中臣才謝深英器慙遠度進寡兵車召陵

之盟退靡朝歌河內之會無束馬山戎之績懸車流
沙之功故望寵未安踐榮加懼况納陛朱戶事絕群
班金璽綠綬儀參鴻典聞命屏營以憂以隊近申微
款日月之鑒旣阻方懼難慊蘭芳之旨愈峻遂致百
辟卿后踟躕於衛闕鑾輅旂旂方幸於臣府悵然遙
慮將貽厚戾文章徒單迄無蠲省而天威咫尺丹懷
罔固輒肅恭文物翹拜榮禮違距以深追增休迫德
輜寵盛於斯爲微非臣鄙虛所能酬對

蕭相國讓進爵爲王第二表

臣結慮歸請三辰未鏡傾寃仰視允天彌阻重炳微
 策再晰光誥理晦情震若涉嚴淵謝中臣業不出世績
 未逮古謬藉明政陳力就列艱多智寡翊贊罔樹若
 乃洪範不修鍾繇旒之日九黎亂政當摧軸之辰雖
 瀝命奉時蘭禍提下亟防明之陋貽慙昔人杜險之
 蔽取愧前英故十萬之師無集豪行之邱千金之貴
 恒單白藏之府戈船發於江湖戎車出於石城然後
 雲徹席卷虔劉巨禍臣實慙焉不悟上賞亟降華爵
 必集雖延首紫局翹意宸居執為守約之志既謝簡
 鑒避賢辭智之請終無開允故受任專征遠邇知寵
 肇封四履候甸推禮昔虞思勤夏不列殊物之錫晉
 叔匡周豈頒上公之典燕藩懿親裁蒙衮鳥之榮梁
 國戚屬方忝旌旗之貴而臣包括庶揆忽納儀形蓋
 出近古非三代之遠體也公復乃踰九命爰超五等
 域中之稱麗天作則探情顧抱崑所允安者哉伏願
 陛下一檢丹崖遂臣慊心無使怵迫深貽庇矣

蕭相國拜齊王表

臣無佐夏匡殷之功威晉服楚之績業不題於宗器

聲靡記於彝典而超居上禮邈乘峻爵靜念隆替焦
 原非譬中謝臣以為衆官咸事帝謨所以式序群后荆
 讓王猷所以載穆况臣訪德語勤未泊伊稷之能藉
 靈懷寵以濫周邵之秩故駐寬仰請瀝意歸聞理竭
 素牒事罄丹史具微太微備簡玉繩而才輪志淺隔
 景絕炤朱輪之使日月亟紉金鑾之尊旦夕將拂巡
 情覽識豈伊寧處今便肅典內軒恭服外屏大夫有
 命古或無違王假有廟今臣為叨三省空懦震據于
 心

齊王謝冕旒諸法物表

臣王言以軒冕雲蹕既非常之飾官懸王戚乃配天
 之禮故呈襟効慮必期蠲亮重被還旨芳訊愈越鏡
 伏殊私情影遠震中謝昔大啓營丘未備樹羽之賞先
 宅曲阜始兼龍旂之貴况道狹慶隆身薄器尊扮璽
 爭輝瓌火鏡耀夫太常圖列星之采華蓋觀古人之
 情所以聳絕百縣崇隔萬寓鳳閣因此而神瓊都由
 茲而麗故愧功慙德違儀避 誠不遙孚理無雙達
 遂貽嚴誥爰斷辭表驚慄遲廻初鑒何地便當肅對

王休敬昭異寵佩服盛文以慨以懼

齊王讓禪表

遠規唐虞永禘之典近慕漢魏高樹之禮既覽金水
昏明之數又協雲電隆替之徵激風太上扇采至公
聞命驚爽心靈殞越中臣聞天地草昧而樹之君所
以平對二儀顯臨萬國膺符受曆愍明司幽軒轅陟
柝首出庶物顛頊登庸作為民紀雖五德迭興十代
繼運非賢非睿莫預斯位若乃與能之交禪錫之會
豈伊虛薄所可尊擬昔傅巖佐商秩終上公礪溪翼
周名極列伯臣才非若人功愧遠聖獄訟不往謂
寧歸河之馬圖之寶天無乘龍之錫元首股肱誓不
可異而曠棄之軌忽臻於茲慙慨憂灼罔識其際伏
願陛下貴舜禹之心臣守巢由之節則道耀日月澤
浸飛泳聲振開闢仁動今古四三王而六五帝不亦
休哉

遣大使巡詔

門下昔明王馭世巡嶽采政睿后司朝觀俗調化故
生無鬱滯物獲脩通釐風拯患於茲為急朕以輜薄

昧于大道因璿璣之曆遵三德之運緬鑒前哲寤寐
永歎思所以闢訪治蠹詢求民瘼才寡務殷若無津
溱故以情深危薄心疚夙夜矣可普遣大使分行四
方推賢薦能問疾舉滯若其采野不闢犴訟有虧妨
氓利害擾黷政經者具以奏聞如其謹言嘉話真士
奇才亦依名騰上隨事均量務取厥中朕將親覽以
弘遠化

賜赦交州詔

門下交部昔值時諉負海不朝因迷遂往歸款莫由
今創制萬寓烟熅造物原形四裔澤浹中畿愍彼邊
氓未均王化宣弘遠仁蕩以更始可曲赦彼州統內
咸同曠泰李叔獻一人卽撫南土其股肱文武詳材
選推并遣大使宣揚朝旨

斷募士詔

門下設募取將懸賞購士蓋出權宜非曰經制頃者
民惟氛藹世襲艱阻因時流故浸以成俗斯風蕩而
未返且滋長逋逸開罪山湖遂乃鯨刑不辱草竊無
咎平政察洽萌合甄革自今已後可悉斷衆募

封江冠軍等詔

門下締基緯業序功攸急開曆闡祚酬庸爲先故以式藹曩書載炳前軌文仲假等或成亮艱危効彰屯誠皆績幹兩宣勒國兼立宜各分珪社以酬厥勞謚

大赦詔

門下朕思弘風教而刑罔猶積未言前烈兢歎載懷今履端告始郡后執贄治洽樂交華夷同泰雖和慙擊石采愧卿雲然景業初基義深恒典慶動玄靈歡溢都縣憫彼幽黔猶隔茲澤思我兆民共熙至化

北伐詔

門下朕統曆馭政志包函夏庶惣文軌無思不服而逃焉狡虜久爲邊虞及宋末不庭授策乖律比州外淪威風內毀鑿彼隆替慨歎盈懷冕旒濟河翦彼凶狄咸秩中岳望祀汾陰則聲教邕矣猶以經綸惟始恩化甫洽勞民擾衆爲政所重故方輟六師按經九伐今淮泗告礪羽書馳聞醜羯妖燼送死比垂徵天人之數撫自來之會無勞遠兵剽撲爲易蓋因茲大號蕩其巢藪可遣使其官組甲十萬鐵騎千馬斜趣

賴洛衝其要津某官其虎旅八萬舳舻數千沿淮長
驅稜威青汴某官其舟師五萬直出淮淝某官控江
右之銳駱驛既進某官其率羽林勁男爲水陸形援
某官其中等並率義勇之衆牙蓋倚角之機戎車戒
路事宜愬一使持節都督南徐兖二州諸軍事後軍
將軍南徐州刺史長沙王晃出次江都爲衆軍節度
驍雄竟奮火烈風掃剋定中原肅清河洛便可內外
纂嚴備辦

王僕射爲左僕射詔

門下端貳樞秘寔惟國禎緝典宣機所寄時彥尚書
右僕射領吏部尚書南昌縣開國公儉器懷明亮風
情峻遠業積珪璋才兼經緯况乃節亮帷幄譽敷端
揆升授之宜蓋允具瞻可左僕射

王撫軍爲安東吳興詔

門下震澤殷輿撫馭須才都官尚書撫軍潯陽郡開
國公敬則志幹貞烈秉情開敏忠勤之至形乎出內
必能綏懷大邦尅隆美政

曲赦丹陽等四郡詔

門下朕興言民瘼昧旦求政所以庶存簡惠緝茲治道而玉燭未調祥風尚鬱京輔及三吳昔歲水災秋登既罕今茲厲疾罹患者多納隍之歎爲矜良深可曲赦楊州所統丹陽吳興南徐州所統義興等四郡其遭水左劇之縣自今年以前三調未充而虛例已畢官長局吏應共備賞者雖卽事爲愆情在可亮外詳所際以弘優澤

王僕射領太子詹事詔

門下管司東朝歷代所重自非國華莫允斯任侍中尚書左僕射南昌縣開國公儉鑒識清贍理懷秀澈績亮朝端譽敷僉議贊業攸光物聽斯緝宜惣二官以穆彝序

何詹事爲吏部尚書詔

門下官人之職實難其選所以弼諧彝品謨明庶績今思治惟急彌不可曠侍中太子詹事戢業履脩平體識詳隱自升官闈美譽咸聞必能無懈于位爰茲流序

王侍中爲南蠻校尉詔

江文通集卷九
門下荆楚殷曠任重寄深毗左之選非良勿授侍中
領祕書監驍騎將軍負秉心貞元志局開亮績譽之
美在公屢彰必能贊政南紀播惠西夏

王光祿爲征南湘州詔

門下衡岳名區荆湘奧壤自頃凋弊綏撫須賢侍中
光祿大夫丹陽尹僧文德履淹邃識局詳正冲素之
朝望攸歸歷職之庸載懷僉聽往任沅湘餘惠在民
今宜重敷善政申此懿績

柳僕射爲南兖州詔

門下河兗衝要維扞中畿司牧之任宜詳其綬後將
軍領軍新除尚書左僕射滇陽郡國公世隆業體淹
濟思情通敏功書王府積彰累任必能宣弘恩政威
懷萬里雖哀疾毀頓而禮有權奪

王僕射加兵詔

門下散騎常侍尚書左僕射太子詹事南昌縣開國
公儉忠欵昭著任寄隆深旣光朝猷允屬民聽宜增
威飾以崇望實可加兵二百

立學詔

門下夫膠庠之典彝倫攸先所以昭振才端啓發性
緒弘世字氓納之軌儀是故五禮之迹可傳六樂之
容不泯朕自膺曆受圖志闡經訓且有群寮奏議橫
集以戎車屢警文教未敷思樂辟雍未言多慨今關
燧無虞時和歲稔遠邇同風華夷慕義便可式遵前
準脩建教學精選儒官廣延國胄

王鎮軍爲中書令右光祿詔

門下綸言要密歷選爲難優秩崇顯允在舊德使持
節都督江州豫州之新蔡晉熙二郡諸軍事鎮南將
軍江州刺史延之業履冲約秉情閑素譽彰頻試績
著累朝自居南服微庸剋舉宜升寵章管兼樞祕

張令爲太常領國子祭酒詔

門下庠議旣敷縉紳攸屬師氏之任宜歸儒素散騎
常侍中書令驍騎將軍楊州大中正緒器識清簡理
懷恬約譽洽朝聞聲緝民聽必能闡揚玄宗式範胄
子兼掌宗伯望實惟宜

蕭冠軍進號征虜詔

門下維翰之重實資名品使持節都督郢州司州之

江文通集卷第九
義陽諸軍事冠軍將軍郢州刺史南昌縣開國侯鸞
體句弘濟器操端敏自蒞任夏首美政殷流必能聿
宣國化以庇人瘼宜崇顯秩允茲聲望

褚侍中爲征北長史詔

門下蕃佐須才非良莫寄侍中領步兵校尉炫識業
清悟思懷淹暢出內之譽日聞其美宜弼諧親屏以
申茂績

江文通文集卷第九

終

江文通文集卷第十

梁 濟陽江淹著

明 新安汪士賢校

齊太祖高皇帝誄

日月鬱華風雲黯色傷動紫微悲匝璇極嗚呼哀哉
粵夏四月辛卯將遷座于泰安陵龍鑿旣整羽衛以
陳深酸舊物掩咽故臣嗣皇帝永訣丹掖叫然青墀
攀神光之一絕慟遠邇之何期弓劍有慕慕德寫辭
僉曰若稽古聖璿圖靈鏡星樞發祥電光啓命誕惟

弱齡惠志聰情如金如璧爰秀爰英於鑠冠歲騰華
流藝允文允武克明克睿聿尚登學嚴道遵師宜散
五禮優游六詩上炫舊滯旁鏡前疑才聲艷采筆盡
麗辭在支斯悌于親伊孝儉泰共色夷阻一貌遊情
黜矩縱心蹈教鄉術式慕州閭是効業優登仕先哲
攸懋矧乃寥廓淵規邃構官府天地舟輿宇宙龍靜
鳳戢歛竒揜秀昔在帝劉王室放命校焉僞誕晦朔
陵正鋒車北軼燿火南盛太祖時乘爰茲發迹塞井
滅勲夷竈寵敵賞鏤王圖功懋帝冊乃厲中葉夫未
歛難兵百表曹禍十楚漢吳地前崩越壤首亂街號
燿盛火列金斷聚甲如陵獻俘爲觀比楚倔強曾未
屈膝雲屯被野魚麗亘日廟勇旣消國圖方匱神冊
天開雄略世出凶劔鱗沈醜戈羽逸隻騎不返蹄輪
無匹厥庸戾止離珮委他榮鬱閭闔寵重山河皇彝
有文朝采方藹頻煩金紐左右緹蓋毗戎肅禁叅輦
侍旆譽馥區中道夢氓外河濟國險淮泗邦塵要藩
重設匪賢則親亦旣推較擁土庇民聲稜絕俗威瞻
殊隣宋主陵遐紫殿邊密話言之詔貽在英粹寅亮

大寶敷綸妙祕世識機鑿物宗淵懿無覓匪練匪奧
不洎三階旣馴五精惟至彭蠡九江地盡襟製亦有
劉範衣纓是絕躍馬山岫泛舟河滢縞鏘星流紅旗
電結鳩翼競扇豺牙爭礪禍纏紫禁兵交丹衛瑤祀
若於金戾如綴朝野傾儀咸歸上德實賴至公瀉家
提國懷險實泰襄危亡必克機筮朝旦功定曠黑妙
物更配具章重則深居撫外遙棲緜默高秩方臻元
禮有序王曰念哉輝寵是與職褻宮閣任卷文武飾
華麗貂縈金疊組宏猷溢俗曾芬冠古憬彼朱方亦
惟宗秩陰圖食昂潛謀貫日征輪未誓偏旗銜律原
燎旣寂世囂伊謐爰崇爰貴以望以實鴈縣告靜象
郡無虞香鬱遠域清麗瓊都國墳氓負朝委事虛寔
翳哲相嶽曜神居功美旣損道富去益再紐契訓重
匡禹迹方同范張濯情汾射散簪山郊解珮松石頰
霞拂朝蒼煙惜夕韻屬玄經恩流金液靈厭霸德少
帝告釁滅慈滅養抵仁抵信枉獄炎鑪淫刑霜刃剖
忠翦義樊稚斲櫬慄慄方垠曰怨曰震妖蜺將崩災
裂昊蒼况乃鼎國資滌資匡臨朝闡命遏昏立綱事

縣毗漢義締翼商旣綏地職亦懋天工權輿典緯俾
作司空黼黻琫戈祐宇升庸徒賜先袞爰永渥冲實
曰驃騎卷迹辭功寰寓睦政畿甸綸風沈氏滔天勃
逆舊楚氣蹂黃池志轢柏舉裂禮紊度毀經棄序黑
騎黥山朱旗頽渚短兵 長鍛爲群顛如海岸轟

似

乃霧激離則霰分荆國旣軼郢縣方焚袁

劉二戾焱

焯發聯謀制外儲兵襲內釁激瓊殿勢

崩金闕志乘玄璽圖矯祕鉞鴻妖逝星高侵棄月惟
時諸侯上脫下競圖服消蕩實綴仁聖輝耀國靈導

揚主命曾規近晰深暮遠鏡左輪朱赭表裏斯定七
德飾歌九功絳詠乃陟上鉉寵文方輝誕錫有秩綵
吹旌旗贊政理光翊教太微寔曰太傅爰登相國緝
垓以禮綜祗以德景福咸湊芳猷允塞羽沐式造絃
縣是則金湯無險軌書攸同迴迴寵迹窈窈睿功寶
珪黛壤俾王千東絢冊是敷懋物旣崇設業設虞丹
懸碧鏞於穆顯相黎元時邕冰州炎徼來獻其蹠鴈
海龍關亦柔好音梁龜棧鼉越險浮深遠戎皆覲上
靈必臨山吐石青野降蜜露瑞芝麗草珍柯爛樹入

崩俗締玄緯幽數睠此妙德跂我王度筵滯炎旻旣
變至公萎蕤媯華文祖受終大宋有訓高撓萬邦容
豫慶雲遊衍南風三服寶位圓光王繩御繡懷古負
黼鳳興丘嶷必靜淵猗咸澄勛辰有作黔牖其義矜
卑廣慈合賤兼愛綴機剋賊輕章削罰迹去繁彥情
歸素一軒靡龍刻楹無丹密越賤申椒楚輟靈橘陵
寢起邑池藻誰縣遙館罕御離房空廡惇教路宮淹
神正殿斟酌信義左右律禮鑿彼皇維燁茲國體胃
業旣樹璧流方啓漢求金岫吳寶銅斬靈若虐德讓

駟却劔寔才爲貴唯功是念火職成允雲官亦濶旣
臯乃益匪穆伊夔無舛巡風寧竦辨詩王燭調文玄
英最節乘山呈瑞航海歸闕不曠景冊靡空歲月受
緯機衡兼甄書史孫韓各辨莊墨異哩昭政往藹洗
鑠前軌逍遙星斗徙倚涼雲春飈方舞秋鴻初分式
謠式詠載績載文邈哉我后淪泳賢聖罄品作號盡
物歸政蒼黎汰驩玄靈刷慶永戩嘉祉方寅景命締
詳有文颺沛將掩理昧人詖道懸世險覓略遺圖忌
華徇儉文闇陳几翌明告漸蜺備關食日月拙精矧

在乘輿宇折宙傾覆纏纒掖悲赴紫局去旋臺之照
襲珠殞之冥嗚呼哀哉帷宮低景輦路戲光側柏門
之黯黯泣松帳之茫茫上官擗而詔御咽群后慕而
侍衛傷攢靈旣儼遠日以筮鬱鬯旣奠龍酌撤素月
夜橫翠煙曉結撻虛金而下欵吟空蕭而增絕嗚呼
哀哉於是颯天駕而從綺輿澁神行而撫文輦傍建
春而南蹕徑宣陽而東踐尚蓋蓋而未散乍眇然而
不轉睇千乘之共吸盼萬騎之相泫魏后之戀譙惻
漢主之懷沛辭金陵之萼義降雲陽之杳藹風奇響
而駐軒煙異色而低旆怨街色之綵驂弔原野之縞
蓋挽夫愴而征馬凝痛縈盈其如帶嗚呼哀哉複林
油雲重山減日御房清淒神路冥謐昭徒肅燾幽祇
竦單攀光灑動臨泉澍泗環座長嚴雕宮永闕寂帳
寂兮寂已遠夜釭夜兮夜何邃嗚呼哀哉

宋故尚書左丞孫緬墓誌文

光靈維周肇祀伊衛炤分上代鏡華中世睿誕降明
秀芳嗣烈學惟物範行實士節容與書林優遊史藝
素巾俄 朱紱累轍來訪詩逸入詢禮缺麗名文質

齊影儒詰慶履匪舒沴氣遽結殞帷兮既晦泉火兮
已閉暖遺波於遙緒颯流馨於遠歲

宋故安成王右常侍劉喬墓誌文

丹陽韞聖豐鄉降賢王業既積金徽方傳乃毓伊人
剋廣克宣騰芬中屬飛藻上年杳杳虛素永永冲關
雲意霜拍瓊立冰堅家寶以瑩國才未甄參錯報善
茫昧雲玄斂鬼幽石委氣空山膚若流波身如絕煙
芳菲一逝美懋徒鐫

宋故銀青光祿大夫孫賈墓誌文

川祗効鏡岳祥獻明珥葉獨秀瑤源自清幼州常譽
夙耀才名體兼遷雲學備儒史紫閣咸趨朱軒既履
貴交慕塵素遊企軌騰藻上京振彩下國如彼綠蘭
秉芬四塞欵人逕之不平歎天路之冥默貴夫君之
爲美播靈均與正則

齊故御史中丞孫詵墓誌文

筠以霜藹蘭以風薰深哉若人寔好斯文系緒承胄
激蘄驚芬才基魏粲學參漢雲覽志上載洽鏡前聞
騰名冠俗揚采絕群方黜明世式替春君如何不淑

天道難分敢雕窆石未晰幽墳

齊故司徒右長史檀超墓誌文

惟金有銑惟玉有瑤君實淵哉行爲世標高志洒落
逸氣寂寥與學內溢深文外昭嘉采籍譽登國振朝
亦既有美筠傷蕙凋人邈運曠世促道遼永矣仁矣
流芳無澆

蕭驃騎祭石頭戰亡文

咸告忠貞之鬼曰義惟行首雄實上節嗟爾驍驍稟
才蹈烈守上不渝懷冰可折氣彰靡旗情曠亂轍高
墉摧堅巨醜挫銳深痛克矜冤及雪隆恩殊悼臨
爾以歆千秋同盡百齡一世鬼而有知咸無遠邇嗚
呼哀哉

蕭太傅東耕呪文

敬呪先穡曰攝提方春黍稷未華灼爍發雲昭燿開
霞地煦景暖山艷水波側聞晨政實惟民天競秬獻
歲務畎上年有滄疎潤興雨導泉崇耕巡索均逸共
勞命彼倌人稅于青臯羽旗銜蕤雄戟燿毫呈典緇
耦獻禮翠壇宜民宜稼克降祈年願靈之降解珮停

鑿神之行兮氣爲較神之坐兮煙爲蓋使嘉穀與玄
鬯永爭光而無沫哉

草木頌十五首 并序

僕一命之微遭萬代之幸不能鑄心礪骨以報所象
擢翼驪首自致丹梯爰乃恭承嘉惠守販閩中且僕
生人之樂久已盡矣所愛兩株樹十莖草之間耳今
所鑿處前峻山以蔽日後幽晦以多阻飢援搜索石
瀨彘彘庭中有故池水常決雖無魚梁釣臺處處可
坐而葉饒冬榮花有夏色茲赤縣之東南乎何其奇
異也結莖吐秀數千餘類心所憐者十有五族焉各
爲一頌以寫勞蒐

金荆

江南之山連障連天旣抱紫霞亦漱絳煙金荆嘉樹
涵露宅仙姮節詎及幽意誰傳

相思

竦枝碧澗卧根石林日月斷色霧雨恒陰綠秀八炤
丹實四臨公子不至山客徒尋

豫章

伊南有材匪桂匪椒下貫金壤上籠赤霄盤薄廣結
捐瑟曾喬七年乃識非日終朝

栢欄

異木之生疑竹疑草攢叢石逕森荻山道煙岫相珍
雲壑共寶不華不緝可避工巧

杉

桐梓崔嵬麗松枯稱奇焉如茲品霍之青崖群木歛望
雜草不窺長入煙氣永參變螭

檉

木貴冬榮檉實寒色停黛峯頂挿翠石側碧葉蒼鶻
頽柯翕絕方陋筠櫛遠笑荆棘

楊梅

寶跨荔枝芳軼木蘭懷葉挺實涵英糝丹鏡日繡壑
焰霞綺巒為我羽翼委君王盤

山桃

惟園有實惟山有蕘丹藹肇露紫榮繞風引霧如電
映煙成虹伊春之秀乃華之宗

山中石榴

美木艷樹誰望誰待縹華翠萼紅華絳采炤列泉石
芬撓山海奇麗不徙霜雪不改

木蓮

迸采泉壑騰光淵丘緇麗碧巘紅艷桂洲山人結侶
靈俗共遊時至不採爲子淹留

石上菖蒲

藥實虛品爰乃輔性却病衛福蠲邪養正縹色外妍
金光內映草經所珍仙圖是詠

黃連

黃連上草丹沙之次禦孽辟妖長靈久視驂龍行天
馴鳳匝地鴻飛以儀順道則利

署預

華不可炫葉非足憐微根儻餌棄劍爲仙黃金共鑄
青艘爭妍君謂無妄我驗衡山

杜若

山中杜若嘉爾翠質不奇不俗載華載實同銜夕露
共烘朝日夷險無二沈冥如一

藿香

桂以過泐廚以太芬摧阻天鑄天折人文詎及霍香
微馥微薰攝靈百仞養氣青霧

雲山讚四首 并序

壁上有雜畫皆作山水好勢仙者五六雲氣生焉悵
然會意題爲小讚云

王太子

子喬好輕舉不待煉銀丹控鶴去窈窕學鳳對噴吮
山無一春草谷有千年蘭雲衣不躑躅龍駕何時遂

陰長生

陰君惜靈骨珪璧詎爲寶日夜名山側果得金丹道
憂傷永不至光顏如碧草若度西海時致意三青鳥

白雲

紫煙世不覲赤鱗庖所捐白雲亦海外蒼蒼起三山
簫瑟王池上空裔帝臺前欲知青都裏乘此乃登天

秦女

青琴旣曠世綠珠亦絕羣猶不及秦女十五乘綵雲
壁質人不見瓊光俗詎聞願使洛靈往爲我道音芬

雜三言五首 并序

予上國不才黜爲中山長史待罪載究識煙霞之狀
旣對道書官又無職筆墨之勢聊爲後文

構象臺

曰上妙兮道之精道之精兮俗爲名名可宗兮聖風
立立聖風兮茲教生寫經記兮寄圖利畫影象兮在
丹青起淨法兮出西海流梵音兮至索溟網紫宙兮
洽萬品冠璇寓兮濟羣生余汨阻兮至南國迹已徂
兮心未扃立孤臺兮山岫架半空兮江汀累青杉於
澗構積紅石於林櫺雲八重兮七色山十影兮九形

金燈兮江離環軒兮匝池相思兮豫章戴雪兮抱霜
栽異木而同秀鍾雜草而一香苔癘生兮石戶蓮
花舒兮繡池梁伊日月之寂寂無人音與馬迹 禪
情於雲 守息心於端石永結意於鷲山長憔悴而
不惜

訪道經

百學兮異文錦派兮綺分珍君之言兮曠無際悅子
之道兮迥不群澹深韻於白水儼高意於浮雲軌賢
豪於後學軼望識於前文茲道兮可傳可傳兮皓然

挾茲心兮赴絕國懷此書兮坐空山空山隱鱗兮窮
 翠嶠水散漫兮涵素壑海外陰兮氣曇曇江上月兮
 光灼灼東南出兮是一山西北來兮乃雙鶴池中蓮
 兮十色紅總前樹兮萬葉落四壁深兮乃沉寥左右
 虛兮如寂寞寂寞兮山室德經兮道表盪寬兮刷氣
 掩憂兮靜疾信若人兮先覺聊與子兮如一

鏡論語

巡青史之殘誥覽朱管之遺冊惟魯濱之一叟信街
 道而探寂世艱險而多阻君英明而不華講業兮齊

衛論精兮汴泗子之說兮義已祕成賈鄭之雄理可
 黃何之壯思惜古人之取才瞰青雲而靖意意恬悵
 兮有端才嶒峻兮可觀憲媯禹而析法襲仁誼而求
 安不嫵婉於戚施寧蹠蹠於馬蘭俾後生之庶士鑒
 明德之音翰惟山中兮寂寞 憂思兮無從石紅青
 兮百疊山濃淡兮萬重日下兮 月出兮銅峯竹
 色兮拂尸水氣兮繞牕味哲人之遺珍折片句兮忘
 老嘉石門之埋名憐柳子之沈道書吳伯於衣袖鏤
 顏子於心抱籌出處之叔仲酌言默之多少若妙行

與上靈非積學之所紹至游夏以升降幸砥心而勿
天

悅曲池

北山兮黛柏南江兮頽石頽峯兮若虹黛樹兮如畫
暮兮今十里朝霞兮千尺千尺兮縣縣青氣兮往旋
桐之葉兮蔽日桂之枝兮刺天百谷多兮瀉亂波雜
礪饒兮鶩蕘泉竟長洲兮匝東島縈曲嶼兮繞西山
山巒岈兮水環合水環合兮石重沓林中電兮雨冥
冥江上風兮木颯颯盟清冷兮遶潺湲白雲起兮弔
石蓮客子思兮心斷絕心斷絕兮愁無閑步東池兮
夜未艾卧西牕兮月向山引一息於鬼內擾百緒於
眼前意春蘭與秋若願不絕於江邊

愛遠山

伯鸞兮已遠名山兮不返逮紺草之可結及朱華之
未晚縹余馬於椒阿漾余舟於沙衍臨星朏兮樹闇
看日爍兮霞淺淺霞兮駭雲一合兮一分映壑兮爲
飾綴澗兮成文碧色兮婉轉丹秀兮益益深林寂以
窈窕上猿狖之所群群猿兮聒山大林兮蔽天楓岫

今筠嶺蘭畹兮芝田紫蒲兮光水紅荷兮艷泉香枝
今嫩葉翡翠累兮翠疊非郢路之遼遠寔寸憂之相接
歛美人於心底願山與川之可涉若溘死於汀潭哀
時命而自愜

應謝主簿騷體

山櫺靜兮悲疑涼澗軒掩兮酒涵霜曾風激兮綠蘋
斷積石閉兮紫苔傷芝原寂少色筠庭黯無光沐予
冠於極浦馳予珮兮江陽弔秋冬之已暮憂與憂兮
不忘使杜蘅可翦而棄夫何貴于芬芳

劉僕射東山集學騷

含秋一顧眇然山中檀藥循 便娟來風木瑟瑟兮
氣芬葢石萋萋兮水成文擿江崖之素草窺海岫之
青雲願芙蓉兮未晦遵江波兮待君

山中楚辭六首

青春素景兮白日出之藹藹吾將弭節於江夏見杜
若之始大結瑀鱗以成車懸雜羽而爲蓋草色綠而
馬聲悲歛泂油以流帶

予將禮於太一乃雄劔兮王鈎日華粲於芳閣月金

披於翠樓舞燕趙之上色激河淇之名謳薦西海之
異品傾東岳之庶羞乘魚文兮錦質要靈人兮中州
入橘浦兮容與心敞悵兮迷所識視煙霞而一色深
秋窈以虧天上列星之所極桂之生兮山之巒紛可
愛兮柯團團谿崎嶇兮石架阻飈飈兮木道寒煙
色閉兮喬木撓嵐氣闇兮幽篁難忌蟪蛄之蚤吟惜
王孫之晚還信於邑兮白露方天病兮秋蘭

石筵徒兮救白雪疊疊兮薄樹車蕭條兮山逼舟

兮水路愍晨夜之摧坐感春秋之欲暮征夫輟而

在位御者跼而載顧

寃兮歸來異方不可以親蝮蛇九首雄虺戴鱗炎宀
一光骨爛寃傷玄狐曳尾赤象爲梁至日歸來無往
此異方

自序

淹字文通濟陽考城人幼傳家業六歲能屬詩十三
而孤邈過庭之訓長遂博覽群書不事章句之學頗
留精於文章所誦詠者蓋二十萬言而愛竒尚異深
沉有遠識常慕司馬長卿梁伯鸞之徒然未能悉行

也所與神遊者唯陳留袁叔明而已弱冠以五經授
宋始安王劉子真略傳大義爲南徐州王新安從事
奉朝請使安之薨也建平王劉景素聞風而悅待以
布衣之禮然少年嘗倜儻不俗或爲世士所嫉遂誣
淹以受金者將及抵罪乃上書見意而免焉尋舉南
徐州桂陽王秀才對策上第轉巴陵王右常侍右軍
建平王主簿賓待累年雅以文章見遇而宋末多阻
宗室有優生之難王初欲羽檄徵天下兵以求一旦
之幸淹嘗從容曉諫言人事之成敗每曰殿下不求
宗廟之安如信左右之計則復見麋鹿霜棲露宿於
姑蘇之臺矣終不以納而更疑焉及王移鎮朱方也
又爲鎮軍叅事領東海郡丞於是王與不逞之徒日
夜構議淹知禍機之將發又賦詩十五首略明性命
之理因以爲諷主遂不悟乃憑奴而黜之爲建安吳
興令地在東南嶠外閩越之舊境也爰有碧水丹山
珍木靈草皆淹平生所至愛不覺行路之遠矣山中
無事與道書爲偶乃悠然獨往或日夕忘歸放浪之
際頗著文章自娛在邑三載朱方竟敗焉復還京師

值世道已昏守忠閑居不交當軸之士俄皇帝始有大功於四海聞而訪召之爲尚書駕部郎驃騎竟陵公參軍事當沈攸之起兵西楚也人懷危懼高帝嘗顧而問之曰天下紛紛若是君謂如何淹對曰昔項強而劉弱袁衆而曹寡羽號令諸侯竟受一劍之辱紹跨躡四州終爲奔北之虜此所謂在德不在鼎公何疑焉帝曰聞此言者多矣其試爲我言之淹曰公雄武有奇略一勝也寬容而仁恕二勝也賢能畢力三勝也民望所歸四勝也奉天子而伐逆叛五勝也

攸之至銳而器小一敗也有威而無恩二敗也士卒解體三敗也搢紳不懷四敗也懸兵數千里而無同惡相濟五敗也故豺狼十萬而終爲我獲焉帝笑曰君談過矣是時軍書表記皆爲草具逮東霸城府猶掌筆翰相府始置仍爲記室參軍事及讓齊王九錫備物及諸文表皆淹爲之受禪之後又爲驃騎豫章王記室參軍鎮東武令參掌詔冊並典國史旣非雅好辭不獲命尋遷正員散騎侍郎中書侍郎淹嘗云人生當適性爲樂安能精意苦力求身後之名哉故

自少及長未嘗著書惟集十卷謂如此足矣重以學
不爲人交不苟合又深信天竺緣果之文偏好老氏
清淨之術仕所望不過諸卿二千石有耕織伏臘之
資則隱矣常願幽居築宇絕棄人事苑以丹林池以
綠水左倚郊甸右帶瀛澤青春爰謝則接武平臯素
秋澄景則獨酌虛室侍姬三四趙女數人不則逍遙
紀彈琴詠詩朝露幾間忽忘老之將至淹之所學
盡此而已矣

江文通集卷第十終

錢塘郭志學寫